

## ATODLEN 2

Rheoliad 2(1)

### Labeli swyddogol a dogfennau swyddogol

## RHAN 1

### Labeli swyddogol

1. Rhaid i label swyddogol a ddefnyddir mewn perthynas â thatws hadyd cyn-sylfaenol fod wedi ei liwio'n wyn gyda llinell groeslinol fioled.

2. Rhaid i label swyddogol a ddefnyddir mewn perthynas â thatws hadyd sylfaenol fod wedi ei liwio'n wyn.

3. Rhaid i label swyddogol a ddefnyddir mewn perthynas â thatws hadyd ardystiedig fod wedi ei liwio'n las.

4. Rhaid i label swyddogol a ddefnyddir mewn perthynas â thatws hadyd sydd i'w profi a'u treialu fod wedi ei liwio'n oren.

5. Rhaid i label swyddogol fesur dim llai na 110 o filimetrau x 67 o filimetrau.

6. Rhaid i label swyddogol ar gyfer tatws hadyd cyn-sylfaenol, mewn perthynas â'r tatws hadyd y mae'n ymwneud â hwy, ddatgan y manylion a ganlyn—

- (a) yr Awdurdod Ardystio a'r Aelod-wladwriaeth neu eu byrfoddau neilltuol;
- (b) rhif adnabod y cynhyrchydd neu rif cyfeirnod y lot;
- (c) mis a blwyddyn ei selio;
- (d) y rhywogaeth, wedi ei ddangos o leiaf yn yr wyddor Rufeinig, o dan ei enw botanegol, y caniateir ei roi mewn ffurf dalfyredig a heb enwau'r awduron, neu o dan ei enw cyffredin, neu'r ddau;
- (e) yr amrywogaeth, wedi ei ddangos o leiaf yn yr wyddor Rufeinig;
- (f) y radd; ac
- (g) y disgrifiad "pre-basic seed potatoes".

7. Rhaid i label swyddogol ar gyfer tatws hadyd sylfaenol neu datws hadyd ardystiedig—

- (a) cynnwys y datganiad "EU Rules and Standards"; a
- (b) mewn perthynas â'r tatws hadyd y mae'n ymwneud â hwy, ddatgan y manylion a ganlyn—
  - (i) yr Awdurdod Ardystio a'r Aelod-wladwriaeth neu eu byrfoddau neilltuol;
  - (ii) rhif adnabod y cynhyrchydd neu rif cyfeirnod y lot;
  - (iii) mis a blwyddyn ei selio;
  - (iv) yr amrywogaeth, wedi ei ddangos o leiaf yn yr wyddor Rufeinig;
  - (v) y wlad lle'u cynhyrchwyd;
  - (vi) y categori;
  - (vii) y radd;
  - (viii) y maint; ac
  - (ix) y pwysau net.

8. Rhaid i label swyddogol ar gyfer tatws hadyd sydd i'w profi a'u treialu—

- (a) cynnwys y datganiadau "variety not yet officially listed" ac "for tests and trials only"; a

*Statws* This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

- (b) mewn perthynas â'r tatws hadyd y mae'n ymwneud â hwy, ddatgan y manylion a ganlyn—
- (i) yr Awdurdod Ardystio a'r Aelod-wladwriaeth neu eu byrfoddau neilltuol;
  - (ii) rhif adnabod y cynhyrchydd neu rif cyfeirnod y lot;
  - (iii) mis a blwyddyn ei selio;
  - (iv) y rhywogaeth;
  - (v) dynodiad yr amrywogaeth y mae'r tatws hadyd i gael eu marchnata oddi tano (y caniateir iddo fod yn gyfeirnod y bridiwr, y dynodiad arfaethedig neu'r dynodiad a gymeradwywyd);
  - (vi) y rhif cyfeirnod mewn cysylltiad â'r cais a gyflwynwyd yn unol â rheoliad 4(1)(a) o'r Rheoliadau Rhestrau Cenedlaethol ar gyfer derbyn yr amrywogaeth o dan sylw ar Restr Genedlaethol;
  - (vii) y maint; ac
  - (viii) y pwysau net.

**9.** Yn achos tatws hadyd o amrywogaeth cadwraeth, yn ogystal â gofynion paragraffau 1 i 8, rhaid i label swyddogol gynnwys yr wybodaeth ychwanegol sy'n ofynnol gan Erthygl 18 o Gyfarwyddeb 2008/62/EC.

**10.** Heb iddo leihau effaith paragraffau 1 i 8, caiff label swyddogol gynnwys unrhyw ddatganiadau pellach—

- (a) sy'n ymwneud â'r cenhedliad maes y mae'r tatws hadyd yn perthyn iddo;
- (b) sy'n ofynnol neu y caniateir eu cynnwys mewn label swyddogol yn unol ag unrhyw ddarpariaeth yn y Rheoliadau hyn neu yng Ngorchymyn Iechyd Planhigion (Cymru) 2006; neu
- (c) sy'n briodol ym marn Gweinidogion Cymru.

**11.** Os nad yw'r label swyddogol yn dangos y cenhedliad maes, bernir bod tatws hadyd yn perthyn—

- (a) yn achos tatws hadyd cyn-sylfaenol, i'r pedwerydd cenhedliad;
- (b) yn achos tatws hadyd sylfaenol—
  - (i) gradd S yr Undeb, i'r pumed cenhedliad;
  - (ii) gradd SE yr Undeb, i'r chweched cenhedliad;
  - (iii) gradd E yr Undeb, i'r seithfed cenhedliad;
- (c) yn achos tatws hadyd ardystiedig, gradd A yr Undeb neu radd B yr Undeb, i'r nawfed cenhedliad.

## RHAN 2

### Dogfennau swyddogol

**12.** Rhaid i ddogfen swyddogol a ddefnyddir mewn perthynas â thatws hadyd cyn-sylfaenol fod wedi ei lliwio'n wyn gyda llinell groeslinol fioled.

**13.** Rhaid i ddogfen swyddogol a ddefnyddir mewn perthynas â thatws hadyd sydd i'w profi a'u treialu fod wedi ei lliwio'n oren.

**14.** Rhaid i ddogfen swyddogol a ddefnyddir mewn perthynas â thatws hadyd sylfaenol fod yn wyn yn bennaf.

15. Rhaid i ddogfen swyddogol a ddefnyddir mewn perthynas â thatws hadyd ardystiedig fod yn las yn bennaf.

16. Rhaid i ddogfen swyddogol, mewn perthynas â'r tatws hadyd y mae'n ymwneud â hwy, ddatgan—

- (a) rhif adnabod y cynhyrchydd neu rif cyfeirnod y lot;
- (b) mis a blwyddyn ei seilio; ac
- (c) y wlad lle'u cynhyrchwyd.

## RHAN 3

### Gofynion Iaith

17. Rhaid i label swyddogol neu ddogfen swyddogol fod yn Saesneg a chânt hefyd fod yn Gymraeg.

18. Yn ogystal â'r testun Saesneg sy'n rhaid ei gynnwys yn sgil paragraff 6(g), rhaid i unrhyw destun Cymraeg sy'n cyfateb ag ef gynnwys y disgrifiad "*tatws hadyd cyn-sylfaenol*".

19. Yn ogystal â'r testun Saesneg sy'n rhaid ei gynnwys yn sgil paragraff 7(a), rhaid i unrhyw destun Cymraeg sy'n cyfateb ag ef gynnwys y datganiad "*Rheolau a Safonau'r UE*".

20. Yn ogystal â'r testun Saesneg sy'n rhaid ei gynnwys yn sgil paragraff 8(a), rhaid i unrhyw destun Cymraeg sy'n cyfateb ag ef gynnwys y datganiad "*amrywogaeth nas rhestrwyd yn swyddogol eto*" ac "*ar gyfer profi a threialu'n unig*".